

Р.С. Исрафилов

АГЪУЛАРИН БУЛАХАР

СТИХИ НА АГУЛЬСКОМ ЯЗЫКЕ

МАХАЧКАЛА 2009

Исрафилов

Рамазан Салимханович

Исрафилов Рамазан Салимханович родился в 1956 г. в селе Фите Агульского района. В 1975 г. закончил Тпигскую среднюю школу и поступил в Дагестанский государственный университет им. В.И. Ленина на факультет иностранных языков (английское отделение). В 1980 году был направлен в Худигскую среднюю школу. А через год перешел работать в родное село Фите. В 1986 году поступил на филологический факультет ДГУ и закончил в 1991.

Работая в Фитинской средней школе Агульского района, защитил в 2001 году кандидатскую диссертацию по педагогике.

Исрафилов Р.С. первый кандидат педагогических наук в Агульском районе. Сейчас работает над докторской диссертацией.

Владеет семью языками: агульским, лезгинским, табасаранским, азербайджанским, русским, английским и со словарем немецким.

В настоящее время работает в филиале ДГПУ и живет в г. Дербенте.

АГЪУЛ ЧІАЛ

Ширин ругъу булах э,
ЮркІуран вун мурад э
Ке батІар вун цІантук э
Хьин гъургъае агъул чІал

Къизил рагъун нур суман,
Вун уларин экв суман,
Дардунын дарман суман
Дуьньяди хье агъул чІал

Рухай вун зурна суман
Кканвей вун час баб суман
Бабас учин кІиркІ суман
Хье ватандин агъул чІал

Чирагъ-чай вей багъларис,
Къува ицІай дарарис
Дифар вея дерейис
БицІи халкъдин агъул чІал

Вун гулушин зун кІесе,
Чин ппара бахсуз хьасе
Агъуларин девлет э
Ме батІар хье агъул чІал

АГЪУЛАРИН БУЛАХАР

Фи ухътан э булахар,
Ширин э ругъу хъеттар
Гъургъай а музи чІалар,
Ругъу хъеттин булахар

Гъази чІири а тукар,
Агучинра юркІ ацІай
Заварилас вей дифар
Джигъил джан сарин акъай

Шавурди кучи ягъуй
КІвалвей ви ругъу хъед
Ге вахттуни час ккандуй
Ви булахин ругъу хъед

Агъуларин Чирагъ-чай
Ккасппи гъуълис вея
Агъуларин Чирагъ-чай
Гъар тукунис нур ицІай

Булахарин тІинкІари
Агъуларин Чирагъ-чай
А че ухътан сувари
Мертте хъеттин булахар

ЗЕ ВАТАНДИН АГЪУЛАР

Зе ватандин агъулар,
Зун упаси квес чІалар
Варибурис ширинттар,
Юркіуралас деветтар

Я, агъулар, агъулар,
Биціи халкъдин инсанар
Ругъу хъеттар ухаттар,
Гъава сува аеттар

Сагъ акъурай агъулар,
Зурбасуман аеттар
Мертти курар акъаттар,
Инсан суман руцаттар

Зе ватандин агъулар,
МидахІан зас канеттар
Фи упушра хъин чІалар
Хъес хъин салам ицаттар

Я, инсанар-агъулар,
Са районди аеттар,
Са чІалалди гъургъаттар,
Са Іадатар хъаеттар

Зе ватандин агъулар,
Сад садилди вереттар
Чиппин намус ухІаттар
Зурбасуман аеттар

Инсанар суман тІушаттар
Зас иджевел акъаттар
Зе ватандин агъулар,
МидахІан зас канеттар

АГЪУЛАРИН ИНСАНАР

Арсуран хІур кум суман
АлацІуна ибхъери
Куъли Іадиял суман
Фацуна хІур дифари.

Агъуларин че сувар
Гъар тукари ацІуна
Угъайи джагвар ибхъер
Че суварис цулана.

Агъуларин Чирагъ-чай
Вун халкъарис къизил э
Агъуларин Чарагъ-чай
Варибурис дарман э.

Мугъу дере ватандин
Гъамиша майдан хъурай
Че инсанар Агъулди
Шатти сагъди адирай

Агъулар чин чІукъ ая,
Зурбабур ппара хъая
Гъар усари чин ая,
Зурбавелдин ттур ая.

Зе ватан э уч Агъул,
Арсуран рухар аеф.
Зе ватан э уч Агъул,
Зурба инсанар аеф.

Че инсанар агъулар
Нанди ичра чаб ая
Куьн упай идже чІалар
Зурбавелдин ттур ая.

ЧЕ АГЪУЛАРИС

Марфар хьурай хьидана
Емишар хьас цулана
Иурдин джагвар ибхьерил
Рази хьасе хьин вари

Агъул район биџиф э,
Амма уч зас ширин э
Че зурба агъуларис —
Чугъ сагъул зе дусттарис

Агъул чІал зе булах э,
Агъул район ватан э
Зе райондин инсанар
ФидахІан зас кканеф э.

Идже усар, ппара а,
Инсанар чаб ппара а
Агъул чІал гьургъа инсан
ФидахІан зас ширин э

Ширин гьургъай ду чІалар —
Мертти ругъу булахар
Зе ватандин агъулар —
Зурба игит инсанар.

СУВАРИС

Арсуран ранг фацуна
Суварис дифар вея
Зе уларис агуна,
ЮркІуралас вейдава

Гъава сувар Агъул а,
Дифари чаб ацІуна
Зун дагъаран кІукІал а
Заварин хед фацуна

Къизилдин нур адина
Ме хъе гъава суварис
Кканиттихъас руцуна
Агундава уларис

ЦІакІинар ппара вея
Агъул сува цулана
Заварис кумар вея
Аш хІуягин, Мадина.

РУШАРИС

БатІар рушар бабарин
Зурба кураp акъибай
Хъасе хъе юрківар сакин
Бабан чІалар фацибай

Зун упасе квес чІалар
Юркіуралас деветтар
Зун ликІенасе кІиджар
Ме дуьньяди ширинттар

Руш хулан вун баракат
Ке батІарди агурай
Кардис акъай хІаракат
Гъамишанди вун хъурай

Ме хъе гъава суварис
Тукарин ранг адирай
Ме хъе мурад сусарис
Бахттлу ягъар агурай

Агъул ппара рушар а,
Тукуласра батІарттар
Гъар са хІури рушар а,
Агушин юркі ацІаттар

Зурба суман аеттар
Зе ватандин инсанар
Гъава суварин тукар
Квес ухшари че рушар.

РУШ

Баба хъае батIар руш,
Тук суман хъучар хъуни.
Адина геда Урудж,
Учихъай руш файшуни.

БатIар шибер дардари,
Бабан джагвар чIарари.
Тукун Iумурал алди,
Хулаас уч верифи.

Джигъил вел дахъурай пуч.
Бахттлу хъурай батIар руш.
Мэ дуьньяди а дардар,
Джагвар вей бабан чIарар.

ФАТИМАТ

Фи батлар вун руш даван,
Хлаеф э вас хьас члалан
Зе джандис дарман суман
Вун дуьньяди, Фатимат

Зурба суман руцая,
Ме дуьньяди вун ая.
Фи ухьтанди агвая,
Варибурис, Фатимат.

Вун суманф уч хьасттава,
Руцушра джиклесттава.
Валас батларф адава
Ме дуьньяди, Фатимат.

Хула ае баракат,
Кардис э вун хларакат.
Вакес ппара муфалат
Ширин джандис, Фатимат.

Тук э гьан, цантук э гьан
Вун дала адава гьан,
Вун Аллагьди еф э гьан
Фи гуьрчег вун, Фатимат

Ме рагьун вун нур суман,
Дагьларин джейран суман
Суварин булах суман
Дуьньяди а, Фатимат

Чалар э ви зас ширин
Вас дахьурай зе улин
Руш э вун варха хлурин
Ле батлар вун, Фатимат



СА ВУН ДАЛА

Са вун дала хьундава,
Зи юркІ ацІуф дуьньяди.
Шадвел зун вас йиндава,
Ппара э зун пашманди.

Вун далара ккандава,
Ширин чІалар дупушра.
Вун далара адава.
Джайнат суман юркІура.

Вун андаваш кІесе зун,
Хьед суман зун гулас э.
Упфуттава кканеф зун,
Зи джандин вун хиял э.

Дуьньяди ае девлет,
Зи уларис вун эхин.
Гьарттис ккане баракат,
Ми дуьньяди вун э хин.

Зас дахьурай уч джайнат,
Дуьньяди вун андаваш.
Зас агвасэ Іаламат,
Ширин ви сес андаваш.

БИЦІИ БАХТТ

Рагъун нур суман адеф,
Дадра бабра шад акъуф.
Зе дадан вун ттур алеф,
МучІе хал Іэкуъ акъуф.

Бахттлу хъурай че гедә.
Акьи вун упуф дада.
Бабас ппара вун кканеф.
Че э вакра муш кееф.

Дагвай агу нур э вун,
БицІи батІар тук э вун.
Дадра бабра шад акъуф,
Багуттар рази акъуф.

БицІи бахтт хула ая,
Іушуйра уч Іашая.
Ягъари инчІар акъай,
Вари вун рази акъай.



БАТІАР РУШАРИС

Фи батІар вун руш даван,
Агуттарис ккан вериф,
Хасиятин вун яман,
ЛидахІан вун мез кейиф.

БатІарвелар йина вас,
Лидис гафра адава
Фес акъуни хал далгъас
Къулкъул мез идже дава

Агуттарис идже руш,
ЧІирхеф упас хъасттава
КІари улар ае руш
Дуьньядил бахтт хъундава

БатІар рушарис дардар
Іумурдира дахъурай,
Дуьньядин, чІирхивелар
Гъамишанди гулурай

АГЪУЛАРИН ЦІАКІИНАР

ЦіаКіинар ппара вея,
Гъар са хІури цулана.
Заварис кумар вея
Аш хІуягин, Мадина.

БатІар сус зас дагушин,
Фиштти хъасе цІаКіинар.
Ккане руш зас дахъушин,
Фиштти хъасе цІаКіинар.

Лихъун акъай джил зурзай,
Че хІури цІаКіин вея.
МагІни акъай зав рухай,
Инсанар мухІтал вея.

Агъул хІури цІаКіинар,
Ппара вея цулана.
Тукар суман а рушар,
Зе юркІурас дивуна.

Хунчабур удигъ хъурай,
Шадвел хъин ппара акъас.
МагІни акъай руш хъурай,
Пашман юркІвар шад акъас.

БИЦІИ ГЕДА

Хье хула айи бицІи гедә
ЮркІуран хье мурад э.
Хье хула айи бицІи гедә
Дадан бабан девлет э.

Хье хула айи бицІи гедә
ГъалидахІан хьес кканвей
Учи акъушин упуф дада,
ФидахІан хьин рази вей

БицІи гедәбури даваттар
Са усара дакъурай
Чиппин дада баба агъаттар
Гъамишанди акъурай.

Хье хула айи бицІи гедә
Дадас бабас куьмек э.
Вун акъи упуф дада
Бабра вал рази хьасе

Зегьмет дадан, бабан ппара э
БицІи гедә ахІмакъ э.
Учра дад суман хьасе
Хье зегьмет къадри хьасе.

СА БАБ

Фиштти инсан вун хьушра,
ФидахІан вун руцушра,
Баб далара адава,
ЦІантукилас батІарфра

Мертти ругъу булахин,
Арсуран нур суварин,
Экв э вун зе уларин,
Захъ хъае вун баб ширин.

Варха рекъус зун веси,
Захъас Іэшаф вун хъасе
Іушуй ахун адавай
Вахъ гъузуна баб хъасе

Баб э гъан дарман э гъан
Дуьньядилаc весигъан
Валас батІарф уч инсан
Ме дуьньяди хъасе гъан

Ме дуьньяди вун э гъан,
Са минути зас агуф
Агуна гулунигъан
Са иджевелра дахъуф

Ме дуьньяди вун э гъан,
ЮркІуралас зе девеф
Вун зас агуф эмкІ э гъан
Са минути зас агуф.

БАБАН ХИЛАР

Фи упушра дуьньяди,
Вун суманф уч хьасттава.
Хье бабарин хиларис,
РахIетвел агундава.

Агъуларин дишегъли,
Валас батIарф адава
Ме гъава хье сувари
Вун дакъу кар андава

Хиларис зегъмат ппара
Бабарин хье агуна
Ме дуьньяди вун сара
Фикъушра джикIесттава

Фи батIарф э агъул руш
Хилиас къизил вереф
Чугъ сагъул вас, агъул руш
Зе ватанди вун аеф


Бабан хилари зегъмат
Вахъас ппара дивуна
Хула хьасе баракат
Бабан чIалар фацуна.

БАБ СУМАН ШЕЙ АДАВА

Баб суман уч адава,
Валас батІарф хьасттава
Ми дуьнья зас йиндава,
Ккане баб зи андава.

ХІурис вей зун дахиди,
Баб уларин экв иди.
Экьу рагъун нур суман,
Ми дуьньяди баб иди.

Зи ккане баб андава,
Уч уларигь гьандава.
Ми дуьнья зас йиндава,
Ккане баб зи андава.



БАБ АНДАВАШ ДУЪНЪЯДИ

ФидахІан упаси чІалар,
Вун дуънъяди андава.
Уларилас вей нигъвар,
Баб захъ сара хъандава.

Пулин ягъуй вун кІини,
Баб захъ сара хъандава.
Джигъил Іумур пуч хъуни
Баб сара джикесттава.

Джигъил дада цІайи баб
Ачахаси хулади.
Зи юркІура айи дард
Гынас упаси гедади.

Етим йисар зи хъуни,
Кканни бабра хъандавай.
Дадас хъира джикІини
Шатти ая аруцай

Гынас йирхІаси улар,
Вун дуънъяди адавай.
МидехІан батІар чІалар
Упасигъан баб дагвай.

ХІураригІ зун гІархъуни,
Баб захъ сара хъандава.
Джигъил Іумур гулуни
Бабан куъмек андава.

Дахи бабра иджеф э,
Амма уч зи баб дава.
Учин ттура Гюзель э,
Амма зун сакин дава.

Джигьил хьир дада хъая,
Гидил учра рази э.
Зи чIарар джагвар вея,
Баб хъандаваф етим э.



ЯГЪАР, ИСАР ЗИ ВЕЯ

Ягъар, исар ухъуьни,
Амма юркІ сакин дава.
Ппара дардар зас хъуни,
Ккани бабра андава

ЭмкІерикес вун агвай,
Уларилас нигъвар вея.
Дуьньяди вун адавай,
Ягъар, исар зи вея.

Хъучархъуни хъир акъас,
Хурубра зи хъундава.
Кканигъан квес зун агвас,
Іумурдил зун шад дава.

Фес кІифигъан ккани баб,
Сара зи бахтт андава.
Фи упушра идже дад,
Баб суман уч шей дава.

Джигъилд амид хъи бабар
Іумурдира дакІирай.
Куьн упай идже чІалар
Баб хъадаваф дахъурай.

ХЪЕ БАБАРИС

Ли шатти айи ягъар
Хаб сара адаси гъан
Вун упунайи чІалар
ЮркІуралас веси гъан

ФидахІан зун эшаси,
Баб сара джикІеси гъан
ФидахІан зун руцаси
Вун сара агваси гъан

Фишти агъал руцІаси
Ви куьмекра адавай
Гьинас баб зун упаси,
Вун дуьньядил адавай.

Пашман хъаси джигъилар
Баб ухъушин никварис
Къун упай иджи чІалар
Гъамишанди бабарис

Эй суварин батІар тук
УькІуфай рукъасе гъан
Ире кІил але цІантук
Мудури уьтІеси гъан.

Эй сувар, гъава сувар
Гъар тукари ацІуна
Ругъу хъеттин булахар
Іурдана гуласе гъан.

ЮРКІУРАЛАС ВЕЙДАВА

ЮркІуралас вейдава,
Баб захъ сара хъандава.
Фи чІалар зун упушра,
Вун уларигъ гъандава.

Ме дуьньяди хьин хелар,
Мупабай цІаку чІалар.
Зурба суман руцушра,
Гьинас ерхІеси улар.

ЮркІуралас вейдава,
Баб сара джикІесттава.
Дад ппара иджеф ичра,
Баб суман уч хъасттава.



ПАЙ ДАЕ ЕТИМ

Марфар угъай хІурари
Етиман джан угада
ЮркІ ацуна дардари
Дуьньяди зун руцада

Зарфелиас хъед суман
Тили вей хулас, етим
Фурсар кейи хан суман
Къунши руцай ви, етим

Пашман вея джигъилар
Адава хин цІакІинар
Акас кканди лихъунар
Гъузуна батІар рушар

Фиштти хъаси дуьньяди
Баб хъандава етим руш
Валас чІирхе рушари
Фурсар акъай, етим руш

Кумак акъаф хъасттава
КІилихъ садра хъасттава
Касиб кканеф адава
Касибвел лазим дава

Дуьнья даеф вун, етим,
Дадра бабра хъандаваф
Ппара пул хъаеф, етим,
Вун хІисабикк ккедаваф.

ВУН АГЪАЙ

Вун агъай муха ппара,
Чахири бахтт адава.
Вун акъи зас са чара,
Ми дуьнья зас йиндава.

Касиб геда зун хьуни -
Дуьньяди вун кканхьуни.
Зи бицIи ватан Агъул,
Хьурай джан вас чугъ сагъул.

ФидахIан иджеф ичра,
Дуьньяди бахтт хьундава
ФидахIан зун упушра
Ми дуьнья са шейъ дава.

Инсанар ппара ая,
Сад садис чаб даккантар.
Iашукъар ппара ая,
ДахIай магIни акъаттар.

Вун агъай муха ппара,
Чахири бахтт адава.
Вун акъи зас са чара,
Ми дуьнья зас йиндава.

Iашукъ – че шинюкк дава,
Дуьнья уч зас йиндава.
Духун фикъа зун сара,
Гьинакра муш кендава.

Вун агъай зун етим э,
Гъами азман дуьньяди.
Вун дагуш зун бахсуз э
Гъами батIар дуьньяди.

Пашман ягъар ппара хъун,
ЮркIура хиял а зи.
Идже Iумур зи гулун,
Вун дала андава зи.

Вун агъай муха ппара,
Чахири бахтт адава.
Вун акъи зас са чара
Ми дуьнья са шей дава.

Вун агъай зун Iаеф э,
Иджеттар чаб андава.
Вун далара хъандава,
Вун дагуш зун етим э.

Захъас идже дусттар
Четин ягъуй гулуни.
Зас агъай ширин чIалар,
Пиянискка акъуни.

Закес хъундава инсан
Чахирикес дустт хъуни.
Хъундавахин зас дарман,
Джигъил Iумур ппуч хъуни.

МЕ ЗЕГЪРЕМАН ІАРАКЪИ

Дустт дава вун душман э,
Варибури ухашра
Дарман дава агъу э,
Фидахлан хьин упушра

Джагвар шуша , Іаракъи
Фи батларди уч агвай
Ппара хьуна Іаракъи,
Инсанар делу акъай

Багъа хьуна уч душман ,
Касибан хал кеттихъай
Фидахлан зурба инсан ,
Юхсуз вея вун ухай.

Шулугъар ппара хьуна,
Вун килис бала хьуна
Гъуши агъай Іаракъи,
Инсан ухай гъерхуна

Аллагъдис душман хьуна,
Ухаттар бала хьуна
Ме Іаркъи зун ухай,
Зун бурджари кецлуна

Ухаттар ппара хьуна,
Инсан вея вакк суман
Дуьньяра уч чіир хьуна,
Іаракъи ая нецлв суман

Хъирахъай зун къал акъай,
Зас дуьнья мучли вея
Дусттарихъай зун ухай,
Зи лумур барбатI вея

Фес ухафе зегьреман,
Хизанар пашман акъай
Давахин ги хъес дарман,
Инсанар маймун акъай



ДВОЙКА

Зас хьуни накъ двойка
Ппара азман рудж хъаеф.
Зе дусттурас пятеркка
Иджи батIар инчI фаеф.

Адини зун чи хулас,
Начди раkk зун дахъуне.
Хъундава бабас упас,
ГучIай гучIай гъузуне.

Идже ихин дусттурас
Гьукай хулас адеттис.
Учин пятеркка бабас
Ге зурбади фадеттис.

Хабра хъасе къал макъал
Накъра суман чи хула
Шатте ая дустт Камал,
Фадаркай ширин пилав.

Джегълем хьурай двойка,
МидахIан зун душман акъуф.
Джан даван уч пятеркка
Хизанар рази акъуф.

ЗЕ ДУСТТ

Зе дустт агъа уч ДжагІфар
Гъамишанди ІутІаф э
Хурафттава уч дарсар,
ІутІас пара кканеф э

Зе дусттурас ДжагІфарас
Гъархъас ппара кканеф э
Зе дусттурас ДжагІфарас
Ттолсттячокра агъаф э

Зе дустт агъа уч ДжагІфар
Іулагъасра гучІаф э
Кееф э ахІа гафар,
Іэшай хулас вериф э

Бабас куъмек уч дакъай,
Куъчабури аеф э
Дада упуттар дакъай
Гъамишанди Іэшаф э

ДжагІфар суман куън махъа,
Куъчабури армуцан
ЧІирхе курар куън макъа,
Хъасе куън ппара пашман

Са мектаби чин ая
МагІлимари дарс ицІай
Вари дарсар хурая,
Дадар бабар шад акъай

ЗЕ ЧІАЛАР ДУСТТАРИС

Зун зе чІалар упасе
ЮркІуралас деветтар
Мус хьунара кІвал хьасе,
Дусттарис зун упутар

Махьанай ширин чІалар
Зун дуьньяди дакканшин
Махьанай куьн, зас дусттар,
Четин ягъуй гулушин

Дусттар дава инсанар,
ЧІирхе фикир хьаеттар
Зун упунае чІалар
Кканхьугана гулаттар

Бахттлу хьурай зе дусттар
Гьамишан захъ хьаеттар
Гебур залде адасе
Дусттар герек хьасе

ФидахІан хьин упушра,
Дустт хьадавай дахьурай
Дусттарик муш кехьурай
Хьехьас чаб камдакьурай

Циппе дусттар захъ хьушин,
ЮркІурас рахІат э зе
Дусттар захьас гулушин
Зуна кІиб талаб э зе.

ДУСТТАРИС

За хъае цӀиппе дусттар
Гъамиша бахттлу хъурай.
Чиппе хъае душманар,
Агун гулун ушурай.

За хъае цӀиппе дусттар
Гъамиша идже хъурай.
Гебури агъа чӀалар
Зи джандис дарман хъурай.

За хъае цӀиппе дусттар,
Уьмурдин ерхи хъурай.
Чиппе хъае хизанар
Гъамиша рази хъурай.

За хъас цӀиппе дусттар
Захъас чаб кам дакъурай.
Чиппе аркъае курар
Хаер кеетар хъурай.

ДУСТТ АНДАВАЙ

Бабас ккани геда и вун,
Ви цІакІинар час дагуф
БатІар дуьнья фатихьун вун,
Экуь хал мучІи акьуф

Вун юркІурал андава, дустт,
Ми дуьнья вас андава
Вун ккани руш хье хІури, дустт,
Чикадмид уч андава

Джигьил бабан Іумур пашман
Вун акьунихин зи, дустт,
ДжикІиндава ли вас дарман,
Дуьнья вун фаттихьу дустт

Макъа сара лиштти Аллагь,
Бабахъас геда гулас
Джигьил бабан Іумур, Аллагь,
Дардар гьамари угас.

ДУСТТ АНДАВАЙ ДУЪНЪЯДИ

Дуънъяди дустт андава,
Сара чІалар хъасттава.
Дуънъяди джикІеси гъан
Вун суман ккане инсан.

Вун андавай Іашай зун,
ЭмкІерикес агвай вун.
Шатте хъуни дустт вахттар
ЮркІура а ви чІалар.

Ун хъуна адина зун,
Агундава улис вун.
ГІулин ягъуй гулуна,
Ае зун Іаджиз хъуна.

ДжикІесттава сара вун,
Етим хъуна ая зун.
Фиштти веси зун хІурис,
Дустт дагвай зе уларис.

Уларилас нецІв вея,
ЮркІурас даккан вея.
Вун суман дустт хъасттава,
ЮркІурас дустт андава.

Іумур веси андавай,
Дардар гъамар зун акъай.
Гъамиша зас дустт кІвалвей,
Са бицІи зун сакин вей.

ГУНИН ДУСТТ ДАХЪУРАЙ

Гунидин дустт дахъурай
Ге дустт дава душман э.
ЮркIуран вахъ дустт хъурай
Итталис ви хъас дарман

Дуьньяди идже инсан
Агушин хъе юркI ацIай
Нандира Iае инсан
Хъе уларис дагурай

Зун упасе ме чIалар
ЮркIуралас деветтар
Ме дуьньяди инсанар
Идже хъуна кканеттар

Iамал макъа дусттарис
ЧIирхетикес дустт макъа,
Ва хъае ккане бабас
ЧIирхIе гафар вун магъа

Дустт агъай вун маруца
Иджевелра кедавай
Зун хъадавай армуца
Зе уларис вун дагвай.

Я, ИНСАН!

Я, инсан, вун инсан э
Дуьньяди аеф.
Баб хьадаваф етим э,
Сатти вун аеф.

Пулар ппара гунтІ ,макъа
Идже агъай вун.
Чирхе курар вун макъа
Шад хьасттава вун.

Зурба дадан вун геда,
Юхсуз вун махъа.
Упу чІалар вас дада,
Гулас вун макъа.

Душманар ппара хьуна.
ХІурилас гулуф.
Дусттар ппара ви хьуна,
Пияниска хьуф.

ТибитІ багъана хьуна
ХІурилас ушуф
Ухуб ппара кканхьуна
Вун бахсуз акъуф

Я инсан, вун инсан э
Дуьньяди аеф
ТамахІ учин ппара э
Фи э вун хареф.

ИНСАНАРИС

Ме дуьньяди, вун инсан,
Юхсуз, бахсуз дахьурай
Хьасе вун ппара пашман
Намус гулуф дахьурай

Нанди ичра, вун инсан,
Зурба суман агурай
Хьасттава ли вас дарман,
ЧирхIе инсан дахьурай

Намус гулуф уч инсан
Дуьньядира дахьурай
Бабас хьу аман-заман
Вун ппара бахттлу хьурай

Четин ягъар адасе,
Шатти исара весе,
Фиштти ичра хьин хьасе,
БатIарфра Iусе хьасе

Гьамишанди, вун инсан,
Рагъу суман нур ирай
Хаб ликIесе зун кIиджар
Бала хьасе вас азмамф

Ппара, ппара ширинттар
Хаб упасе зун чIалар
Дуьньяди ке батIарттар...
Баб фаттихьуф дахьурай

ЗУРБАБУРИС

Иджеф агъай вас хІури,
Инсан суман вун ая
Вал рази э чин вари,
Зурба суман руцяя

Зурбабур ппара хьурай,
Агъул район ацІурай
Дадар бабар шад акъай,
Гьамиша бахттлу хьурай

Вун ІухІу дадас бабас,
Учис чугъ сагъул хьурай
Зурба геда вун, Ильяс,
Вун Аллагъди ІухІурай

Дарсар идже вун хурай,
Зурба упун ттур ая
Хула кумакар аркъай,
Баб ппара рази вея

ХІурмат акъай ахІеттис,
Кумак акъай Іусеттис
Идже дустт вун бицІетис,
Салам ицІай адеттис

Зурбабур ппара хьурай,
Агъул район ацІурай
Дадар бабар шад акъай,
Куьн Аллагъди ІухІурай.

Ц У Л

Къизилдин нур адина
Даран цѣабус цулана
Джил фацуна вей дифар
Гьер вахттуни цулана

Кулак тѣушай цулана,
Марфар угъай цулана
Булди ая емишар
Гьер вахттуни цулана

Малар хѣуппар кук хъуна
Гъузуна хъе цулана
Фи кканчра джикѣя хъин
Гьер вахттуни цулана

Тумар узас вахтт хъуни,
Гѣулин ягъар гулуни
Мектабис хъин веяхин
Гьер вахттуни цулана.

ЦУЛАНА

Марфар угъай, джил къешай
Ягъар вея цулана
ТагІди хъуна Чирагъ-чай,
Сурат кІари акъуна

Гъава сувар Агъул а,
Дифари чаб ацІуна
Зун дагъаран кІилил а,
Заварин хед фацуна

Къизилдин нур адина
Ме хье гъава суварис
Кканиттихъас руцуна
Агундава уларис

ЦІакІинар ппара вея
Агъул хІури цулана
Заварис кумар вея
Аш хІуягин, Мадина

Цулин ягъар Агъулди
ЦІакІинар фай адирай
Рушар хъая хъехъ булди
ЦІакІинар хъас цулана

І У Р Д

Вас упасе зун чІалар
БицІи-бицІи ширинттар
Іурдин вей микІил ягъар
ФидахІан чаб цІиппеттар

Джилар ая рукъ суман,
Меркквар ая гъан суман
Джагвар адиял суман,
Джил фацай пачІагъ суман

Рази э вал шиникквар,
Ппара аркъай даваттар
Акъай ибхьерин туппар,
Чиппин гъаекай ягъар

Маларис вун рахІат э,
Инсанар вал рази э
Вун адаваш дуьньяди
ФидахІан чин Іаджиз э.

ХЪУРАЙ САРА

БицIи бахтт хула хъурай,
Пашман юркIар шад акъай
ХIуни хъе сала хъурай,
БицIиттарис некк ицIай

КIиркIар зурбабур хъурай,
Iусе дад рази акъай,
Идже рушар хъехъ хъурай
Тукар суман хъес агвай

Агъулар бахттлу хъурай
БицIи район вартт акъай
Сад садис салам ицIай
Шатти Iумур хъе хъурай

Ме дуьнья сакин хъурай,
Ижевелар хъес агвай
ЧIирхе инсан уч кIирай
Ге уларис дагурай

Хъурай сара дуьньяди,
Фишра дагвай Iаджизди
Ме ерхе хъе Iумурди
Гъамишанди хъин дуьзди

ФИШТТИ ХЬУНА ДУЪНЬЯДИ

Ме дуънья хьес инаф э
Инсанар суман руцас
Вун дуъньядис адеф э
Дадра бабра шад акъас

Бабан зегьмат ппара э,
Васра зегьмат агвай э
Вун дуъньядин инсан э,
Валди ягъар адас э

Дуъньяди дардар ппара
Хьес дагІвубур агуна
Хьасттавахин хьес чара,
Хье курар хьин дакъуна

Ме дуъньяди кар дава,
Инсанар чаб чІирхьуна
Агъаттар акъай дава,
Модни шейар кканхьуна

ЧІирхеф иджеф хьес агвай
Ягъар исар хье вея,
Ттурсецкки шейар гъушай
Инсанар делу вея.

ЧІІРХЕ ГЕДА ДАХЪУРАЙ

ЧІирхе гедa дахъурай,
Дуьньядис уч дайирай
Уларисра дагурай,
Бабахъра уч дахъурай

Идже батІар руш хъурай
Рагъу суман нур ицІай
Идже курар акъурай,
Дадра бабра шад акъай

ЧІирхе гедa дахъурай,
Бабан юркІ пашман акъай
Уларис уч дагурай,
Зурба дад уджуз акъай

Идже батІар руш хъурай
Хула кумакар акъай
Нанди ачра щад акъай,
Учин намус уьхурай

ЧІирхе гедa дахъурай,
Учи уч бахсуз акъай
ХІуринттар, делу акъай,
Дуьньядил уч дахъурай

Идже батІар руш хъурай
Дадан ттур багъа акъай
Уч Аллагъди ухІурай;
Учис баркала агъай

Чирхе гедә дахьурай,
Инсанар бизар акьай
Бабан Іуьмур пуч акьай
Дуьньядил уч дахьурай



МЕ ДУЪНЪЯ

Ме дуънъя дуънъя дава,
Ме дуънъя са шей дава
Ме дуънъдин дардари
Ки́л гъава зи хъундава

Ппересттройка вун агъай,
Ппара инча́р вун акъай,
БарбатI акъуни дуънъя
Вари шейар багъа вей

Машинар ппара хъуна,
Ариш вариш вартт хъуна
Касиб инсан Iаджизди
Iашай рухай гъузуна

Ме дуънъя дуънъя дава,
Гъинасра вун ккандава
Пул хъадава уч инсан
Агунара ккандава

Касиб геда зун хъуни,
Хъайи дусттар гулуни
Пулар ппара хъудахIан
Инсанар къудур хъуни

Инсанвел дагулурай
Шатти ягъар адирай
Чи́р дахъурай хъе хIукмат
Инсанар бахттлу хъурай

ДУЪНЪЯДИН ДАРДАР

Куъли заварин хедар
Улар ирхей куъная
Джанди кейи хиялар
Агун гулун вейдава

Гъази чІири а тукар
Гъар рангари ацІуттар
Уларилас вея нигъвар
Зи джан угас ккейиттар

Фиштти хъаси дуънъяди,
Куън зас упай чІалар
Шад хъаси юркІ душмандин
Хъандавашин захъ дусттар

Зурба дадан уч геда
Душмандин хула махъа
Иджи гафар упушра
КІейитикес дустт макъа

ЮркІура хиял а зи,
Пашман ягъар ппара хъун
Дадра бабра кІини зи
Закес иджевел дагун.

ДУХТТУРАРИС РАЙОНДИН

Зурбавелдин ттур ая
Идже батIар инсандин
Мертти курар акъая
Духттурари райондин

Варибурис багъа э,
Инсанар чаб рази э
Ви хилар час дарман э,
Учин ттура Закир э

Зурбавелдин ттур ая
Учин ттура Раджаб э
Духтурар ппара ая,
Гебурил чин рази э


Ттерапеввт э ФатIимат
Инсанар вун сагъ акъай,
Вас агъай чин ФатIимат
Гъамиша бахттлу хъурай

Силибарин духттур э -
ХIабибулагъ че дустт э
Iусеттар вал рази э,
Учра зурба инсан э

Зурбавелдин ттур ая
Вира духттур Саният,
Валди хумбар чаб вея -
Агъуларин баракат.

Іуси вея ХІуриччай,
Дардар-гъамар вун акъай.
Иттаттар ппара агвай,
А вун вари сагъ акъай.

Агъуларин духттурар
Гъамиша бахттлу хъурай
Чиппи аркъае курар,
Гъамиша идже хъурай.



ИНСАНАР ИДЖЕ ХЪУРАЙ

Фес хьуфи вун дуьньядил
Дардар ппара хьас ккейиф
Фес хьуфи вун дуьньядил
Джигьил дамид пуч вериф

Фес хьуфи вун дуьньядил
Варибурис ккан вериф
Фес хьуфи вун дуьньядил
Варибурис дард хьариф

Фес хьуфи вун дуьньядил
ЮркIвар вун чи шад акьай
Фес хьуфи вун дуьньядил
Бабан Iумур пуч акьай

Фес хьуфи вун дуьньядил
ЭмкIерикес вун агвай
Фес хьуфи вун дуьньядил
Зи юркI вун пашман акьай.

ДЖАН УГАЯ ДАРДАРИ

Джан угая дардари
Алчагъар ппара хъуна
Ме гъава хъе усари
Алчагъар къудур хъуна

Ме дуьньяди алчагъар
ФидахІан салхуш хъуна
Гебури агъа чІалар
Вари зас къулкъул хъуна

Даш-баш ицІай алчагъар
Къулугъарин вартт вея
Аркъай ширин чІалар
Чиппин курар дуьз вея

Мертти инсан дуьньяди
ФидахІан бахсуз хъуна
Ме хъе гъава сувари
Алчагъар алтар хъуна

Дуьнья хъикай чаб дацІай
ФидахІан чаб бул хъуна
Зун суманттар адавай
Вари курар фацуна

Хъе кардин начальникар
Хъе кІилис бала хъуна
Алчагъарис чаб дусттар
Саса инсанар хъуна.

ВУН ДУЪНЬЯ ГЫНАНФ ЭГЪАН

Вун дуънья гынанф эгъан,
Алчагъари чІир акъуф.
Вун дуънья гынанф эгъан,
Дардари зи джан угуф.

Зи ухътан ширин ватан,
ФидахІан касиб хъуна.
Зи гуджлу батІар ватан,
ФидахІан чІирхІе хъуна.

Вун дуънья гынанф эгъан,
ЛидахІан дагІвубур хъуф.
Вун дуънья гынаф эгъан,
Инсанарин джан угуф

Хъуна кканде дуъньяди
Иджи батІар Іадатар
Час Горбача дуъньяди
Агваракъуни Іаламат

Вун дуънья гынанф эгъан,
Іадатар вун чІир акъуф
Вун дуънья гынанф эгъан,
Касибарин джан угуф.

ВУН ДУЪНЪЯДИ АДАВАЙ

КІина веси батІар руш,
Джагвар джан ви ругарис
Кееф иди вак зи муш,
Агваси гъан уларис

Вун дуънъяди адавай,
Гъинас ирхеси улар
Ккани руш захъ хъадавай,
Гъинас упаси чІалар

ФидахІан иджеф ичра,
Дуънъяди бахтт хъундава
ФидахІан батІарф ичра,
Ми дуънъя вас индава

Вун дуънъяди адавай,
Пашман ягъар зи вея
ФидахІан зун аруцай,
Вун суманф джикІесттава

ФидахІан зурба ичра,
Иджевел вас хъундава
ФидахІан мертти ичра,
ЮркІ сакин ви хъундава

Вун дуънъяди адавай,
Уларилас нигъвар вея
Ми дуънъяди вун дагвай,
Бахсуз суман зун ая

ЭмкІерикес вун агвай,
Ппара пашман зун вея.
Дуьньяди вун адавай,
Ягъар исар зи вея.

ДУЬНЬЯ УЧ СА ШЕЙЪ ДАВА

Фес хьуфи гъан дуьньядил вун,
Тукун Іумур ви гулуф.
Ви дардари угуни зун,
Шатти Іумур ви дахьуф.

Фес хьуни гъан дуьньядил вун,
Джигъил дамид пуч вун хьуф
Ми ширин дуьнья фаттихьун,
МучІи ругарис ушуф.

Бабан Іумур пуч хьунихин,
Гъамишанди вун кІвалвей
Ппара шатти чин удихин,
Ви куьмекил рази вей

Экуь рагъун вун нур суман,
Час агуни дуьньяди
Джегълемдин азият суман
Джан угуни дардари

МИ ДУЪНЪЯ

Фана хьуна дуънъя вея,
Вун адавай зун Іашая.
ЮркІуралас зи вей дардар,
Ушунихин экуъ ягъар.

ЮркІуралас зи весттава,
Вун уларис агвасттава.
Вун суман баб джикІесттава,
Уларин негъв рукъасттава.

Фи батІарду ми хьи сувар,
Агъуларин хьи инсанар.
Бабан чІалар гуласттава,
Миштти усар ахъасттава.

Баб ругари дутІурай вун
Джайнати баб ахъурай вун.
Тукарис вун лекар атай,
Уларис вун зи агурай.

ВАРИБУРИС БАГЪА Э

Къулугъарин эхІаф э,
ХІуринттарис душман э.
ЧІирхи велдин фурсар э,
Амма учра алчагъ э.

ХІурмат хъурай аради,
Варибурис вун кканди.
Вари хъин Іуси хъаси,
Кум суман исар веси.

Варибурис багъа э,
Зуна сатти етим э.
Ви акъулра ппара э,
Юхсузарис душман э.

МИ ДУЪНЪЯДИ ХЪУНДАВАХИН

Ми дуънъяди хъундавахин
Ккани суман аруцас
Ккани рушас хъундавахин
Зас ширин чІалар упас.

Ми дуънъяди хъундавахин,
Бабас иджевел акъас.
Захъас баб гулунихин,
Учин зегъмет къадрихъас.

Ми дуънъяди хъундавахин
ЮркІуран дардар хъакъас.
Шатти Іумур хъундавахин
Дадан юркІ сакин акъас.

Ми дуънъяди хъундавахин
Іумур ччиччин шад акъас.
Пашман ппара хъин хъасихин
Баб гулуш дуънъядилас.

СА ШЕЙ ДАВА ГУМУР

Заварилас луфар суман,
Джигьил исар ушуна зи.
Ппара чІалар упуначра,
ЮркІ хияли ацІуна зи.

Іашас кканде уларис зи
ЮркІурастти вун кканчира.
Дуьньяди бахтт хьундава зи
ЭмкІерикес вун агушра.

АХИРИМЖИ ГАФАР

Ппара, ппара андава
Дуьньядис улар атас.
Са вас дала ккандава
Зи пашман улар ирхес.

Вун бадала дуьньядил,
Хьуна зун гулас ккейиф.
Мукь вея ви заварил,
ЛидахІан фурсар кееф.

ВАСИЯТ

Лазим дава зас чІалар,
Дуьньядилас зун гулуш.
Фиттис э гъан ли чІалар,
Душман инсанди упуш.
Зун андава дуьньяди.

Затте дусттар адирай,
Зун кканеттар дуьньяди.
Ширин чІалар упурай,
Зун андава дуьньяди,
ЧІалар рухІтис унхъасе.

Іашай кІея зи къари,
ЮркІурасте зун кканеф.
ЯгІар хъуна вас къари,
Дуьньядилас зун гулуф,
Ппара хъуна вун пашман.

Зурба дадан куьн чІалар
Гъамишанде кІвал акъе.
Зун акъунае курар,
Зурба суман куьн акъе,
Зун андаваш дуьньяди.

ЗУН АНДАВАЙ ДУЪНЪЯДИ

Дуънъядилас зун хая,
Вари атун дуънъяди.
Зи ккани руш Іашая,
Дад икІая никвари.

Ме дуънъяди зун кІвалвей,
МагІниди сес атІуна.
КІина пуна юркІ девей,
Іашай захъ руш гъузуна.

Баб пашман зи дахъурай,
Зун андавай дуънъяди.
Дуънъядис улар атай,
Зи баб а вун пашманди.

Зун юркІурал андава,
Са бабас э зун кканеф.
Дусттарихъ зун хъандава,
Гынас игъан зун хІаеф.

Джагвар хъуна джигъил дад,
Хулан шадвел гулуна.
«Дахи кІине зурба дад», -
Дардар учис агуна.

ФидахІан хъин упушра,
Дуънъя са шей дава.
Бабас ппара кканчира,
Фира акъас вейдава.

Содержание

АГЪУЛ ЧІАЛ.....	3
АГЪУЛАРИН БУЛАХАР.....	4
ЗЕ ВАТАНДИН АГЪУЛАР.....	5
АГЪУЛАРИН ИНСАНАР.....	6
ЧЕ АГЪУЛАРИС.....	8
СУВАРИС.....	9
РУШАРИС.....	10
РУШ.....	11
ФАТИМАТ.....	12
СА ВУН ДАЛА.....	14
БИЦИ БАХТТ.....	15
БАТИАР РУШАРИС.....	16
АГЪУЛАРИН ЦІАКІИНАР.....	17
БИЦИ ГЕДА.....	18
СА БАБ.....	19
БАБАН ХИЛАР.....	20
БАБ СУМАН ШЕЙ АДАВА.....	21
БАБ АНДАВАШ ДУЪНЪЯДИ.....	22
ЯГЪАР, ИСАР ЗИ ВЕЯ.....	24
ХЪЕ БАБАРИС.....	25
ЮРКІУРАЛАС ВЕЙДАВА.....	26
ПАЙ ДАЕ ЕТИМ.....	27
ВУН АГЪАЙ.....	28
МЕ ЗЕГЪРЕМАН ІАРАКЪИ.....	30
ДВОЙКА.....	32
ЗЕ ДУСТТ.....	33
ЗЕ ЧІАЛАР ДУСТТАРИС.....	34
ДУСТТАРИС.....	35
ДУСТТ АНДАВАЙ.....	36
ДУСТТ АНДАВАЙ ДУЪНЪЯДИ.....	37
ГУНИН ДУСТТ ДАХЪУРАЙ.....	38
Я, ИНСАН!	39
ИНСАНАРИС.....	40
ЗУРБАБУРИС.....	41
Ц У Л.....	42
ЦУЛАНА.....	43
І У Р Д.....	44
ХЪУРАЙ САРА.....	45
ФИШТТИ ХЪУНА ДУЪНЪЯДИ.....	46
ЧІИРХЕ ГЕДА ДАХЪУРАЙ.....	47
МЕ ДУЪНЪЯ.....	49
ДУЪНЪЯДИН ДАРДАР.....	50

ДУХТТУРАРИС РАЙОНДИН.....	51
ИНСАНАР ИДЖЕ ХЪУРАЙ.....	53
ДЖАН УГАЯ ДАРДАРИ.....	54
ВУН ДУЪНЪЯ ГЪИНАНФ ЭГЪАН.....	55
ВУН ДУЪНЪЯДИ АДАВАЙ.....	56
ДУЪНЪЯ УЧ СА ШЕЙЪ ДАВА.....	57
МИ ДУЪНЪЯ.....	58
ВАРИБУРИС БАГЪА Э.....	59
МИ ДУЪНЪЯДИ ХЪУНДАВАХИН.....	60
СА ШЕЙ ДАВА ГУМУР.....	61
АХИРИМЖИ ГАФАР.....	61
ВАСИЯТ.....	62
ЗУН АНДАВАЙ ДУЪНЪЯДИ.....	63



Агульский район село Фите